


武經七書



六韜 一二

漢書門類			
九	五	二	號
七	一	二	函
一	〇	二	架
一	四	二	冊

內閣文庫			
九	五	二	漢書
一	〇	二	函
一	四	二	架
一	四	二	冊

七一

內閣文庫			
番號	漢	9522	
冊數	14 (11)		
函號	299	209	



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



武經七書卷之七 兵韜卷第一

文韜

文師第一

淺草文庫

文王將田史編布卜曰田於渭陽將大得焉非龍非
鬻非虎非熊兆得公侯天遺汝師以之佐昌施及三
王文王曰兆致是乎史編曰編之太祖史疇為禹占
得臯陶兆比於此文王乃齊三日乘田車駕田馬田
於渭陽卒見太公坐茅以漁文王勞而問之曰子樂
漁邪太公曰君子樂得其志小人樂得其事今吾漁

甚有似也文王曰何謂其有似也太公曰釣有三權
祿等以權死等以權官等以權夫釣以求得也其情
深可以觀大矣文王曰願聞其情太公曰源深而水
流水流而魚生之情也根深而木長木長而實生之
情也君子情同而親合親合而事生之情也言語應
對者情之飾也言至情者事之極也今臣言至情不
諱君其惡之乎文王曰唯仁人能受正諫不惡至情
何爲其然太公曰緡微餌明小魚食之緡網餌香中
魚食之緡隆餌豐大魚食之夫魚食其餌乃牽於緡

8
人食其祿乃服於君故以餌取魚魚可以殺以祿取
人人可竭以家取國國可拔以國取天下天下可畢
嗚呼曼曼綿綿其聚必散嘿嘿昧昧其光必遠微哉
聖人之德誘乎獨見樂哉聖人之慮各歸其次而立
斂焉文王曰立斂何若而天下歸之太公曰天下非
一人之天下乃天下之天下也同天下之利者則得
天下擅天下之利者則失天下天有時地有財能與
人共之者仁也仁之所在天下歸之免人之死鮮人
之難救人之患濟人之急者德也德之所在天下歸

之與人同憂同樂同好同惡者義也義之所在天下
赴之凡人惡死而樂生好德而歸利能生利者道也
道之所在天下歸之文王再拜曰允哉敢不受天下
之詔命乎乃載與俱歸立爲師

盈虛第二

文王問太公曰天下熙熙一盈一虛一治一亂所以
然者何也其君賢不肖不等乎其天時變化自然乎
太公曰君不肖則國危而民亂君賢聖則國安而民
治禍福在君不在天時文王曰古之聖賢可得聞乎

8

太公曰昔者帝堯之王天下上世所謂賢君也文王曰
其治如何太公曰帝堯王天下之時金銀珠玉不飾
錦繡文綺不衣奇怪珍異不視玩好之器不寶淫泆
之樂不聽宮垣屋室不堊音惡甍桷椽楹不斲茅茨徧
庭不剪鹿裘禦寒布衣掩形糲梁之飯藜藿之羹不
以役作之故害民耕織之時削心約志從事乎無爲
吏忠正奉法者尊其位廉潔愛人者厚其祿民有孝
慈者愛敬之盡力農桑者慰勉之旌別淑德表其門
閭平心正節以法度禁邪僞所憎者有功必賞所愛

者有罪必罰存養天下鰥寡孤獨振贍禍亡之家其
自奉也甚薄其賦役也甚寡故萬民富樂而無饑寒
之色百姓戴其君如日月親其君如父母文王曰大
哉賢德之君也

國務第三

文王問太公曰願聞爲國之大務欲使主尊人安爲
之柰何太公曰愛民而已文王曰愛民柰何太公曰
利而勿害成而勿敗生而勿殺與而勿奪樂而勿苦
喜而勿怒文王曰敢請釋其故太公曰民不失務則

8

利之農不失時則成之薄賦斂則與之儉宮室臺榭
則樂之吏清不苛擾則喜之民失其務則害之農失
其時則敗之無罪而罰則殺之重賦斂則奪之多營
宮室臺榭以疲民力則苦之吏濁苛擾則怒之故善
爲國者馭民如父母之愛子如兄之愛弟見其饑寒
則爲之憂見其勞苦則爲之悲賞罰如加於身賦斂
如取於已此愛民之道也

大禮第四

文王問太公曰君臣之禮如何太公曰爲上唯臨爲

下唯沉臨而無遠沉而無隱爲上唯周爲下唯定周則天也定則地也或天或地大禮乃成文王曰主位如何太公曰安徐而靜柔節先定善與而不爭虛心平志待物以正文王曰主聽如何太公曰勿妄而許勿逆而拒許之則失守拒之則閉塞高山仰止不可極也深淵度之不可測也神明之德正靜其極文王曰主明如何太公曰目貴明耳貴聰心貴智以天下之目視則無不見也以天下之耳聽則無不聞也以天下之心慮則無不知也輻輳竝進則明不蔽矣

明傳第五

文王寢疾召太公望太子發在側嗚呼天將棄予周之社稷將以屬汝今予欲師至道之言以明傳之子孫太公曰王何所問文王曰先聖之道其所止其所起可得聞乎太公曰見善而怠時至而疑知非而處此三者道之所止也柔而靜恭而敬強而弱忍而剛此四者道之所起也故義勝欲則昌欲勝義則亡敬勝怠則吉怠勝敬則滅

六守第六

文王問太公曰君國主民者其所以失之者何也太
 公曰不謹所與也人君有六守三寶文王曰六守何
 也太公曰一曰仁二曰義三曰忠四曰信五曰勇六
 曰謀是謂六守文王曰謹擇六守者何太公曰富之
 而觀其無犯貴之而觀其無驕付之而觀其無轉使
 之而觀其無隱危之而觀其無恐事之而觀其無窮
 富之而不犯者仁也貴之而不驕者義也付之而不
 轉者忠也使之而不隱者信也危之而不恐者勇也
 事之而不窮者謀也人君無以三寶借人借人則君

失其威文王曰敢問三寶太公曰六農六工六商謂
 之三寶農一其鄉則穀足工一其鄉則器足商一其
 鄉則貨足三寶各安其處民乃不慮無亂其鄉無亂
 其旅臣無富於君都無入於國守長則君昌三寶全
 則國安

守土第七

文王問太公曰守土奈何太公曰無疏其親無怠其
 衆撫其左右御其四旁無借人國柄借人國柄則失
 其權無掘壑而附丘無舍本而治末日中必彗操刀

必割執斧必伐日中不彗是謂失時操刀不割失利之期執斧不伐賊人將來滄消不塞將為江河熒熒不救炎炎奈何兩葉不去將用斧柯是故人君必從事於富不富無以為仁不施無以合親疏其親則害失其衆則敗無借人利器借人利器則為人所害而不終於世文王曰何謂仁義太公曰敬其衆合其親敬其衆則和合其親則喜是謂仁義之紀無使人奪汝威因其明順其常順者任之以德逆者絕之以力敬之勿疑天下和服

守國第八

文王問太公曰守國奈何太公曰齊將語君天地之經四時所生仁聖之道民機之情王齋七日北面再拜而問之太公曰天生四時地生萬物天下有民聖人牧之故春道生萬物榮夏道長萬物成秋道斂萬物盈冬道藏萬物靜盈則藏藏則復起莫知所終莫知所始聖人配之以為天地經紀故天下治仁聖藏天下亂仁聖昌至道其然也聖人之在天地間也其實固大矣因其常而視之則民安夫民動而為機機

動而得失爭矣故發之以其陰會之以其陽爲之先
唱而天下和之極反其常莫進而爭莫退而遂守國
如此與天地同光

上賢第九

文王問太公曰王人者何上何下何取何去何禁何
止太公曰上賢下不肖取誠信去詐僞禁暴亂止奢
侈故王人者有六賊七害文王曰願聞其道太公曰
夫六賊者一曰臣有大作宮室池榭遊觀倡樂者傷
王之德二曰民有不事農桑任氣游俠犯歷法禁不

從吏教者傷王之化三曰臣有結朋黨蔽賢智障主
明者傷王之權四曰士有抗志高節以爲氣勢外交
諸侯不重其主者傷王之威五曰臣有輕爵位賤有
司羞爲上犯難者傷功臣之勞六曰強宗侵奪凌侮
貧弱傷庶人之業七害者一曰無智略權謀而重賞
尊爵之故強勇輕戰僥倖於外王者謹勿使爲將二
曰有名無實出入異言掩善揚惡進退爲巧王者謹
勿與謀三曰朴其身躬惡其衣服語無爲以求名言
無欲以求利此僞人也王者謹勿近四曰竒其冠帶

偉其衣服博聞辯辭虛論高議以爲容美窮居靜處而詐時俗此姦人也王者謹勿寵五日讒佞苟得以求官爵果敢輕死以貪祿秩不圖大事貪利而動以高談虛論說於人主王者謹勿使六曰爲雕文刻鏤技巧華飾而傷農事王者必禁七曰僞方異技巫蠱左道不祥之言幻惑良民王者必止之故民不盡力非吾民也士不誠信非吾士也臣不忠諫非吾臣也吏不平潔愛人非吾吏也相不能富國強兵調和陰陽以安萬乘之主正羣臣定名實明賞罰樂萬民非吾相也夫王者之道如龍首高居而遠望深視而審聽示其形隱其情若天之高不可極也若淵之深不可測也故可怒而不怒姦臣乃作可殺而不殺大賊乃發兵勢不行敵國乃強文王曰善哉

舉賢第十

文王問太公曰君務舉賢而不能獲其功世亂愈甚以至危亡者何也太公曰舉賢而不用是有舉賢之名而無用賢之實也文王曰其失安在太公曰其失在君好用世俗之所譽而不得其賢也文王曰何如

太公曰君以世俗之所譽者為賢以世俗之所毀者為不肖則多黨者進少黨者退若是則羣邪比周而蔽賢忠臣死於無罪姦臣以虛譽取爵位是以世亂愈甚則國不免於危亡文王曰舉賢奈何太公曰將相分職而各以官名舉人按名督實選才考能令實當其名名當其實則得舉賢之道也

賞罰第十一

文王問太公曰賞所以存勸罰所以示懲吾欲賞一以勸百罰一以懲衆為之奈何太公曰凡用賞者貴信用罰者貴必賞信罰必貴耳目之所聞見則所不聞見者莫不陰化矣夫誠暢於天地通於神明而况於人乎

兵道第十二

武王問太公曰兵道何如太公曰凡兵之道莫過乎一者能獨往獨來黃帝曰一者階於道幾於神用之在於機顯之在於勢成之在於君故聖王號兵為凶器不得已而用之今商王知存而不知亡知樂而不知殃夫存者非存在於慮亡樂者非樂在於慮殃

今王已慮其源豈憂其流乎武王曰兩軍相遇彼不可來此不可往各設固備未敢先發我欲襲之不得其利爲之奈何太公曰外亂而內整示饑而實飽內精而外鈍一合一離一聚一散陰其謀密其機高其壘伏其銳士寂若無聲敵不知我所備欵其西襲其東武王曰敵知我情通我謀爲之奈何太公曰兵勝之術密察敵人之機而速乘其利復疾擊其不意

武經七書六韜卷第一

武經七書六韜卷第二

武韜

發啓第十三


文王在鄴召大公曰嗚呼商王虐極罪殺不辜公尚助予憂民如何太公曰王其脩德以下賢惠民以觀天道天道無殃不可先倡人道無灾不可先謀必見天殃又見人灾乃可以謀必見其陽又見其陰乃知其心必見其外又見其內乃知其意必見其疏又見其親乃知其情行其道道可致也從其門門可入也

立其禮禮可成也爭其強強可勝也全勝不闔大兵
無創與鬼神通微哉微哉與人同病相救同情相成
同惡相助同好相趨故無甲兵而勝無衝機而攻無
溝塹而守大智不智大謀不謀大勇不勇大利不利
利天下者天下啓之害天下者天下閉之天下者非
一人之天下乃天下之天下也取天下者若逐野獸
而天下皆有分肉之心若同舟而濟濟則皆同其利
敗則皆同其害然則皆有以啓之無有閉之也無取
於民者取民者也無取民者民利之無取國者國利

之無取天下者天下利之故道在不可見事在不可
聞勝在不可知微哉微哉鷲鳥將擊卑飛斂翮猛獸
將搏弭耳俯伏聖人將動必有愚色今彼有商衆口
相惑紛紛渺渺好色無極此亡國之證也吾觀其野
草菅音姦勝穀吾觀其衆邪曲勝直吾觀其車暴虐
殘疾敗法亂刑上下不覺此亡國之時也大明發而
萬物皆照大義發而萬物皆利大兵發而萬物皆服
大哉聖人之德獨聞獨見樂哉

文啓第十四

文王問太公曰聖人何守太公曰何憂何嗇音色也萬物皆得何嗇何憂萬物皆適音囚也政之所施莫知其化時之所在莫知其移聖人守此而萬物化何窮之有終而復始優而游之展轉求之求而得之不可不藏既以藏之不可不行既以行之勿復明之夫天地不自明故能長生聖人不自明故能名彰古之聖人聚人而為家聚家而為國聚國而為天下分封賢人以為萬國命之曰大紀陳其政教順其民俗羣曲化直變於形容萬國不通各樂其所人愛其上命之曰



大定嗚呼聖人務靜之賢人務正之愚人不能正故與人爭上勞則刑繁刑繁則民憂民憂則流亡上下不安其生累世不休命之曰大失天下之人如流水障之則止啓之則行靜之則清嗚呼神哉聖人見其始則知其終文王曰靜之奈何太公曰天有常形民有常生與天下共其生而天下靜矣太上因之其次化之夫民化而從政是以天無為而成事民無與而自富此聖人之德也文王曰公言乃協予懷夙夜念之不忘以用為常

文伐第十五

文王問太公曰文伐之法奈何太公曰凡文伐有十
二節一曰因其所喜以順其志彼將生驕必有好事
苟能因之必能去之二曰親其所愛以分其威一人
兩心其中必衰廷無忠臣杜繆必危三曰陰賂左右
得情甚深身內情外國將生害四曰輔其淫樂以廣
其志厚賂珠玉娛以美人卑辭委聽順命而合彼將
不爭姦節乃定五曰嚴其忠臣而薄其賂稽留其使
勿聽其事亟為置伐遣以誠事親而信之其君將復

合之苟能嚴之國乃可謀六曰收其內間其外才臣
外相敵國內侵國鮮不亡七曰欲錮其心必厚賂之
收其左右忠愛陰示以利令之輕業而蓄積空虛八
曰賂以重寶因與之謀謀而利之利之必信是謂重
親重親之積必為我用有國而外其地必敗九曰尊
之以名無難其身示以大勢從之必信致其太尊先
為之榮徽飾聖人國乃大偷十曰下之必信以得其
情承意應事如與同生既以得之乃徽收之時及將
至若天喪之十一曰塞之以道人臣無不重貴與富

惡災與咎陰示大尊而微輸重寶收其豪傑內積甚厚而外爲之陰內音納智士使圖其計納勇士使高其氣富貴甚足而常有繁滋徒黨已具是謂塞之有國而塞安能有國十二曰養其亂臣以迷之進美女滯聲以惑之遺良犬馬以勞之時與大勢以誘之上察而與天下圖之十二節備乃成武事所謂上察天下察地徵已見乃伐之

順啓第十六

文王問太公曰何如而可爲天下太公曰大蓋天下

然後能容天下信蓋天下然後能約天下仁蓋天下然後能懷天下恩蓋天下然後能保天下權蓋天下然後能不失天下事而不疑則天運不能移時變不能遷此六者備然後可以爲天下政故利天下者天下啓之害天下者天下閉之生天下者天下德之殺天下者天下賊之徹天下者天下通之窮天下者天下仇之安天下者天下時之危天下者天下災之天下者非一人之天下唯有道處之

三疑第十七

武王問太公曰予欲立功有三疑恐力不能攻強離
 親散衆爲之奈何太公曰因之慎謀用財夫攻強必
 養之使強益之使張太強必折太張必缺攻強以強
 離親以親散衆以衆凡謀之道周密爲寶設之以事
 玩之以利爭心必起欲離其親因其所愛與其寵人
 與之所欲示之所利因以疏之無使得志彼貪利甚
 喜遺疑乃止凡攻之道必先塞其明而後攻其強毀
 其大除民之害滯之以色啗之以利養之以味娛之
 以樂既離其親必使遠民勿使知謀扶而納之莫覺
 其意然後可成惠施於民必無愛財民如牛馬數
 食之從而愛之心以啓智智以啓財財以啓衆衆以
 啓賢賢之有啓以王天下

8

武經七書六韜卷第二

武經七書六韜卷第二

文化丙寅

武經七書

六韜卷第二

